

Seiqgyaiq Daengzcog

Haetromh, gou ninz ndiu lo. Gou yawj coh rog cueng: Yi, ranzlaeuz baihrog baenzlawz bienq sang lo, cungj yawj mbouj raen dingj laeuz bw? Yawj ndaw ranz, ndaw ranz baenzlawz cij miz heiqliuz caeuq sairaiz gak saek gak yiengh daengj doengh-yiengh cang gyaeu, gvih, daiz, sahfaez cungj mbouj raen lo! “Di——” sing ndeu, gou mbouj siujsim daemj deng aen anniu he, gyasei cienzbouh okdaeuj lo, caen saenzgeiz ha!

Gou ngamq ok dou, couh deng baihrog gingjsaek vava loegloeg maez dawz lo. Boux vunzgihi ndeu byaij gvaqdaeuj naeuz: “Bouxcawj iq, mwngz dwg daeuj moq ba? Gizneix dwg 25 sigij, gou daiq mwngz yawjyawj.”

Gou simcingz gikdoengh youh ngeizngwd, riengz boux vunzgihi daeujdaengz gyang singz, gizde aenranz cungj guh baenz yiengh gofaex, vanzlij miz gij goengnaengz lumj gofaex nei sawj hoengheiq bienq cengh, gizde miz cwngefuj bumwnz fuengbienh vunzlai banh saeh, miz hagdangz maenhndei, miz ciugaep bakhua sanghcangz……

Hagdangz daengzcog saedcaih dwg aen hag-

dangz yienghiengh cungj guh ndaej he. Hagdangz daengzcog baen baenz 100 aen ranghdieg hung, 60 aen ranghdieg iq, laeb miz duzsuhgvanj, gohgi-gvanj, dijuvgvanj, yinhyozdingh, laigoengnaengz-dingh daengj. Youq gizneix, hix miz doenghduz iq dwggyaez daiq gyoengq lwnyez ndonj gvaq fwjraiz duj youh duj, youq ndaw damqra mboujduenh sou ndaej cihsiz, gagsaeng caeuq vaiqvued.

“Yi, neix dwg aen angen gijmaz?” Gou vix aen anniu nding gwnz aenseizgan cam vunzgihi. Vunzgihi naeuz: “Gaej naenx aen angen neix!” De itmienh naeuz itmienh iet fwngz laengz gou, youq mwh laengz gou, fwngz de naenx aen angen wnq. Cij dingqnyi vunzgihi hemq “daengz——” sing ndeu, aenseizgan sikhaek mbin daengz ciugaep bakhua sanghcangz lo. Doxgaiq ndaw ciugaep bakhua sanghcangz caen lai ha! Gou cungj yawj dava liux. Yi, gyoengqvunz gizneix guhmaz cungj hai ci haeuj ndaw sanghcangz ne? Vunzgihi naeuz: “Hwhw, neix couhdwg gij saenzgeiz 25 sigij, mwngz siengj bae gizlawz, cungj ndaej hai ci daengz gizde, mbouj deng hanh saek di! O, seizgan gvaiz lo, gou anbaiz



aen rug cwxcaih he hawj mwngz yietnaiq ba.”

Gou menhmenh ngonzyawj aen singz moqsag neix, yienzhaeuh naengh aenseizgan riengjrit ma daengz aenrug ndaw ciujden vunzgihi gaeng anbaiz ndei haenx. Mwh gou youq bakcueng ngonzyawj gingjsaek gyaunde, baez mbouj siujsim, gou sawqmwh doek roengz yangzdaiz……

A, gou ndiu lo, raen gou gingqyienz lij youq gwnz mbonq. Laxlawz dwg gou loq lo, ciengz loq neix geijlai ndei ha! Gou cungj mbouj saeng neix cij dwg ciengz loq he!

(ngeih nienzgaep Yangz Hauhih)



Bwzsez Gunghcuj Ranz Gou

Gou daj iq couh gyaiez duz-douqhau, douqhau dwg cungj doenghduz gvaigvet unqswnh he, aiq dwg aenvih cungj singq neix, ndigah gyoengqde youq ndaw goj-lwnyez gij yiengh de gig dwggyaez.

Douqhau daengxndang yungz-yupup, lumj ndaek dangzfaiz hung he, hawj vunz nyaenx mbouj ndaej siengj haeb gaemz he. De miz lwgda nding'yan, aenrwz raez-rangh, diuzrieng dinjdet, lij miz aenbak sam dip daegbied he, lumj go'nywj mbawsamdip nei.

Mwh de gwn doxgaiq couh loh ok song gaiq heujnaj youh hung youh raez. Song gaiq heujnaj gou hix gig hung, miz vunz naeuz gou mwh riu couh lumj lwgdouq, hojsik gou sug duzlungz, mbouj sug duzdouq, danghnaeuz gou ndaej gaij baenz sug duzdouq couh ndei lo.

Daxmeh cawx duz douqhau ndeu hawj gou. Gou aeu siengceij guh aen rongz ndei yawj he hawj lwgdouq, youq ndaw siengceij bu hwnj bauqceij dangguh aen-mbonq lwgdouq. Gou lij youq baihindaw cuengq aen vanj he hawj

de coux doxgaiq gwn. Gou mbouj raix raemx hawj de, aenvih gou dingq daxmeh naeuz, duzdouq moix ngoenz gwn byaek couh ndaej bouj gaeuq raemx ndaw ndang de aeu haenx, mbouj caiq lingh gwn raemx lo.

Gou moix ngoenz cungj aeu lauxbaegnding caeuq byaekheu gueng duzdouq, duzdouq hix maij gwn gak cungj mak. Yawj gij yiengh de ngaem gyaieu nyinhcaen gwn doxgaiq, simcingz gou hix bienq ndaej ndei lai lo.

Miz seiz, gou iet lwgfwnz gvaq bae hawj de, ndaw fwngz mbouj miz doxgaiq, bak de hix iet gvaqdaeuj. Fwngz gou daeng bae daeng dauq, de hix riengz daeng bae daeng dauq, lumjdwg dawz lwgfwnz gou dangguh doxgaiq guhcaemz, dwggyaez dangqmaz!

Gou gig gyaiez duzdouqhau, de hawj ndaw gwndaen gou daiq daeuj haujlai yinxdaeuz. Gou an aen coh he heuh “bwzsez gunghcuj” hawj de, gou itdingh henhoh ndei de, mbouj hawj de deng sieng.

(ngeih nienzgaep Linz Singhi)

Lwgda Daxmeh

Meh ha, mwngz rox lwi? Ndaw lwgda mwngz miz boux vunz ndeu, boux vunz iq lumj lwg ndeu, lwg riu, de caemh riu.

Meh rox lwi? Boux vunz de couhdwg gou lwi? Laxlawz gou ciengzseiz youq ndaw lwgda meh ma?

Ciengzseiz youq ma? Yiengh-neix, gou gag boux vunz ndeu bae gwnz bya aeu lwgmak, roxnaeuz gag boux vunz ndeu bae henz dah liuh, meh goj yawj ndaej raen ma?

Yawj ndaej raen ha? Yiengh-neix meh bae Haijnanzdau guh-hong, byaij gvaq henz haij, roxnaeuz hwnj bya aeu yw, goj yawj ndaej raen gou ha?

Hix yawj ndaej raen ha? Meh cungj yawj ndaej raen lwg ha? Meh youq gizlawz goj ndei, lwg youq gizlawz goj ndei, cungj yawj ndaej



raen ha?

A, meh ha, gou mboujdan ciengzseiz youq ndaw lwgda meh ndwi, lij ciengzseiz youq ndawsim meh ha?

Ndaejni Gojgaeq Nyaenma Le



Boh ha, nyaenma guhlawz hag rox guhrwix baenzneix ne?

Ciuh doek ciuh goj caemh yiengh-neix ma? Nyaenma seiziq goj guhrwix baenzneix ga?

Guhrwix baenzneix ma? Nyaenx bohme de vihmaz mbouj guenj de ne?

Bohme de goj guhrwix baenzneix ma? Guhrwix baenzneix goj guh bohme ndaej ha? Vunzrwix rox yaeuh vunz rox guhcaeg, guhlawz guh bohme ndaej ne!

(Daj 《Bonjsei Sim Lwnyez》
(Veiz Gizlinz raiz) senj okdaeuj, Lwg-fwngzme/卢奋长 hoiz)